



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**25. Kalenderwoche – ab 19. Juni 2011**

## Vorgähblische Miede

Eischendlich habsch langsam de Nase voll von Urlaub un Rumreesn un so! Ährlich, isch bin nu in meim bißl Lähm ooch schon soviel rumgereesd, dass isch misch kaum noch an was erinnorn kann. So off Anhieb! Was is wann un wo gewähsn? Isch weeßes nisch mähr! Un daderbei is immor alles, wennis gewähsn is, sähr indressand gewähsn! Un scheen! Das weeß isch noch! Abor isch weeß nisch mähr was wann un warum indressand un scheen gewähsn is! Un wo?!

Guhd, isch kennde nu unsre ganzn Fodos raussuchn... un de Dias... un de Vidjos... In de ledzdn Jahre had ja meine Gudste alles gleich offn Gombjudor geschbeischord... da däde mir dann villeischd beim Anguggn dies un jenes widdor einfalln. So rein obdisch, vom Äußorn hähr! Abor de Dedails... de Jahreszahl... de Nam von de Erbauor... un von de Kinsdlor... ehm alles das, was de so erfahrn dusd, wennse dir was erzähln dun, wennsde wo bisd... - isch weeß nischd mähr! Obwohl... - un das weeß isch ganz genau!- ... obwohl isch immor ganz genau droffgeheerd hab! Weils ja ooch immor indressand gewähsn is! Un wenn isch nisch droffgeheerd hädde, da hädde misch meine Gudste abor zureschdgeschdauchd! Bass off, du Gulduhrbanause! - hädde se gesachd. Un schbädesdens dann, hädde isch droffgeheerd, was de Reisefiehror erzähln dun. Isch will ja im Urlaub keen Ärschor mid meinor Gudstn risgiern! Nee, isch hab immor droffgeheerd. Ganz wissbegierisch! Abor isch weeß nisch mähr... - nascha, das hadde isch ja schon gesachd, dass isch nisch mähr weeß, was isch geheerd hab un was daderdran eischendlich so indressand gewähsn is.

Isch kann mir ooch nisch vorschdeln, dasses Leide gähm dud, die sisch das alles märkn kenn! Ooch meinor Gudstn dud das nisch viel bessor gehn, als wie mir. Bloß e kleenes Bißl dud die mähr wissn! Villeischd, weil die immor de Reisefiehror zusätzlisch lähsn dud. Abor ledznendes weeße

ausm Kobb ooch nischd Genaues mähr! Un warum nu, wemmor hinnorhähr bloß noch Bruchsdigge in dor Erinnerung ham dud, warum dud mor dann jedsma widdor irschendwo im Urlaub zu de Sähenswirdischkeidn renn? Sisich alles erklärn lassn? Droffheern! Schdaunen!

Alleene das, was isch in die dreidtausend Kerschn un Dome geheerd hab, in die misch meine Gudste neingescheuschd had... odor irschendwelsche Ruinen... odor... beriehmde Leide, die dord gelähbd ham, wo mir warn... odor geschdorm sin, wo mir warn... odor die ooch dord im Urlaub warn, wo mir warn... was weeß isch denne heide noch, wo mir grade warn?

Nee, es is eenfach zuviel! Iebor jedn Flegg off dor Landkarde, dähr greeßor als wie eene Erbse is, duds een Reisefiehror gähm. Iebor jede Kersche, jedes Musäum, jedes Dorf... un dann de Schdädte! Nee, isch hab mir ganz ernsdhafd vorgenomm, im Urlaub nisch mähr droffzuheern, wasse mir alles erzähln wolln. Eenfach so e bißl guggn un daderbei denkn, dass isch schon näschdes Jahr nisch mähr weeß, dass isch das gesähn hab, was isch sähn du. Villeisch dud das dähn Erholungseffggd vorschdärkn? Bloß... bloß meine Gudste darf das nadiehr lisch nisch märkn. Die däde mir eens Husdn - vonweeschn nisch droffheern!... vonweeschn Erholung! Busdekuchn!

**Eduard Sachsenmeyer**